

巢

民

詩

集

題驛

辟疆東都名士秦川貴游
風流映坐聲華被物名都
美人更倡迭和指國割宅
傾身弗給客來万里歌豔

四時固閑豪之勝概亦文
人之福澤矣而今乃紙牕
雪夜梵林清晝福壽二三
高人衲子寒吟淒咏於殘
香活火殊煙薄醉之中心

理么弦如扣裏玉如函蘭
王過雨如秋城上送砧蓋
其結習豪情剷除淨盡霜
降水首澄懷味道故能播
棄一切披寫天真此辟疆

老於涉世之立自起深心
易氣三復而諦觀之未易
測其旨趣上取此也予弄
辟疆三十年忘形交其之
子穀梁青象以從游吾門

十餘年中函憂患難多兩
人易地同上下吾老矣望
岫息心得早為東臯歲寒
酬和上一人相奔追每平
生太行並門茫上萬狀於

故我復何增損當為盡狀
而一笑也

辛亥中秋後一夕獲月

太常器中念穀梁將行

為腹撰安語俟來書於

東窗急鼓闌干時作此
冷淡生活或偈他日詩
家一則奉事耳

同學弟龔鼎孳題

悲咤一篇書水繪菴集後

潁川年眷同學弟劉體仁撰

劉子讀碎疆詩客睨曰是冒子之詩耶劉子曰士
固有時孔北海謂盛季章實丈夫之雄也天下談
士倚以揚聲又云今之少年喜謗前輩或能譏評
季章季章要爲有天下大名九牧之人所共稱歎

予每讀書至此未嘗不三復悲咤也一孝章耳當其盛游談榮其名時移勢異則譏評不免豈孝章之所自致歟碎疆名父子自年十四五時卽走尺書納交董文敏諸公間俊邁日聞所交盡天下奇士士之渡江而北渡河而南者無不以雉皋爲歸請謝問遺交羅於塗殆數十年及家日貧猶不敢

謝客而身則皤然一老矣於是譌議繆誚濤駭蠅
黷修名自喜之士遂汨沒震掉無復寧處碎疆何
罪哉碎疆得名久而年又已高念故人零落生平
勝賞豪舉皆如夢幻時時追述以抒其悲至當世
名流鉅公心膽相信者又喜流風不墜輒稱道以
自慰此亦碎疆志趣足感者也世之病之者得無

止是耶亦少過矣。季章以忌而困於孫氏，猶豪傑之流，宜耳。碎疆文雅，素心力行，季友樂施愛衆，所謂仁人君子耳。世幾欲困之，則又何也？若碎疆幸而效用盛時，不知世之視之者何如也。予與碎疆游於白下時，年始二十，碎疆則十年以長。嗣後止一見於吳陵舟中，乃予於碎疆則實兄事之，不敢

愛力蓋舊友之存者可數見一人焉則同時之友
如歷歷在目物少則益戀人情也今年南下碎疆
於暑雨中掉牒子過從予於蕪城惆悵相對者十
餘日不暇及筆墨事茲讀其集如聽繡嶺宮前翁
唱開元曲客何訝之溪邛客亦憫然而退遂以書
其集後

十餘年不見

水繪中人見

水繪中人詩見

水

繪中人矣獨坐巨波浪掀翻恣遊

戲非水繪中人不能也退殘豐

千年来遭逢亦往亡出意外嘗自

嘆曰風恬浪靜靈巖不如諸佛水

漲船高諸佛不如靈巖知我者謂
我心憂不知我者謂我何求當時
命之艱危引長風而浩歎知

水繪中人若銅虎符合也敢此蕚報
惟鑒注不宣

辛亥春靈巖釋弘儲具復

巢民詩集卷一

雉皋冒襄碎疆著

五言古

庚寅送春同芝麓先生于皇心甫園次于彌陀菴卽席用龍標夜宿王大公館原韻

悵然滯遊蹤
凌遽何所務
浪跡詩酒間
驚心匪細故
前日桃花南
昨日惡木路
冥心領玄靜
豁然空旁驚
入門仍我輩
香氣沁清露
晨夕期往來
旁觀厭其屢
畱春送征帆
春去尚廻顧
漠漠江天鳥
依

依楊柳樹寺僻閉門佳細雨蒼天暮中有古處人
免褐浮乳素屏花濕臙脂圓牖上紅霧浮生幾聚
散相對翻惜晤把臂滌芳潤羣息俱偃步衆慮一
時清靜生筆墨趣始知塵外客一室無他慕嚮夕
發疎磬白雲不知數

偕石夏宗出郭訪菊南村雨歸步少陵西枝
村尋置草堂地夜宿贊公土室二首韻

南郭訪秋容載酒驅篳路前夜雷雨發波溢橫塘
渡我友二三人後來適吾素深霜結陶社漠野尋

晚趣迷路矚高原
兔徑多迴步眷幽
佳思穆契曠
頻指顧雖少雲物
態尚未凝寒
沍傾耳有遠鴻放
眼卽紅樹畧徇到
柴門
蓊翳忽頽暮一入
吉雲宅
花浮五色露

其二

黃花燦紅紫
畢竟秋色靜
內室森高下
未燈想深
影冷艷固天姿
繁植賴閒永
觴咏息波瀾
閉門心
古井檀欒綠不盡
罷亞紅遺秉
老木雜壽簾
蒼翠
與諸迥
况復林中
人清才脫秀
穎我有南山
田結

鄰應不屏惜別恰冒雨滑滑泥如嶺重來看晚英
明月遲松頂

甲午舉月送趙友沂入都四首和鄧孝威原

韻

鴻儔冥塵跡夙契謝岐言平生肅心交于子得其
原朱夏握香蘭展孝馳幽燕採艾酌玉椀揮手黃
金鞭膝前咨出處萬里豈徒然彩筆騁鳬藻吐飲
生雲烟馬首指顧間奇峰槩蒼天君舉桂苑旗余
臥女蘿絃

其二

繫余古巢民茫然仰平楚升沈世態心跡遠見真
侶韻宇蓄宏深風檢峻霞舉素枉鮑叔知荷鋤匹
樽俎酌子巨叵羅椒桂充芳醕君豈浮雲委隨時
閱寒暑丈夫念疇昔劃然脊孤許望古倦遙岑暮
遠依修渚把手白雲外躊躇當深語深語恐世嗔
余也蓬蒿人

其三

捎雲挺明玉寧在恒流間鐵穎戰文場匹馬可當

關避子卓犖鋒期子以靜閒長安百丈塵珍重霜
雪顏况復喬嶽尊一堂娛古歡幕捧碧液卮朝上
桃花餐靜聲蓋六合功名令且完疇儷古展禽惟
我清旁觀時命與物理哲人環其端世寶直諫書
霜威六月寒

其四

黃鵠奮霄漢衝暑事遐征邁往不可攀俯視青雲
平英風發麗藻大業何崢嶸惟余悵臨岐一樽百
感生長歌招隱篇同送幽燕城男兒重久要寧戀

世上名毫髮歸蹇修褻躬以貞榮遲子勒銘後還
山冀耦耕

贈汪荅文邦江載鶴詩

汪君珪璋器夙協支公趣扁舟潞河來十月雷塘
仕歛爾邁蘭儀惠然訪舊雨譚諧暢文史申寫罄
丹素維時王使君與君昔傾注霄旦擁輜輶長筵
匝新故手擎綠玉杯口誦瑤華句三日忽言別牽
挽浩不顧使君謂汪君子歸且無遽空庭鶴一雙
翩翩弄羽毛愛彼凌霄姿不隨雁與鷺特以持贈

君君其善相遇生平謹潔極騫翔必天路君乃別
使君此意金石固烏榜載修翎直向寒江渡

步譚只收乙未秋中過訪見貽原韻

平生情一往深注寒河坻仙人不駐塵良覲阻奔
曦倡和寄雪蘭寒香流墨池大廈白日傾橫雲恣
梟鴟歛息偷牖下炊黍潛東菑千里重見存念昔
勤相推升沉多異態胡子泯參差古逸不可式長
鑱師鹿皮冥機戲海鴻用拙笑工陲攬輝下歸昌
月穴通管窺慇懃解漢壁投我名山詞呼兒倒敝

篋尋書檢舊詩，夙爲而翁憐。近辱阿連知，再枉蓬蒿車。入室屢不遺，睠茲古人意。撫心中夜疑。

乙未秋從許力臣師六園林讌會卽席步韻
三五兔魄升，光映蘭香披。梧下匿餘生，二仲遠不遺。過我南山南，曾溪環深陂。埋照逾十年，金石永不移。眷言同心友，羣洽吐華滋。把袂罄平生，白首真可期。回思舊遊人，盼睐今已稀。垂涕沾衣裳，初願寧終違。辟彼失林禽，迴翔得所歸。醉理山水音，安知物外非。乾坤浩茫茫，聚散此一時。長嘯凌霜

風稽阮睥天儀

其二

荒林翳蒲葦孤嶼水中央
茫然枕烟雲聿觀白日
長開徑揖素交四座生
幽光藐盼極藻野騰步咸
芬芳况茲桂盈庭筮月正
素商浮杯共嫵婉扣舷
羣相望仰視青天高俯看
白鶴翔傾倒遺景刻快
意誠難量疇昔繁華子鬢
髮成老蒼竟夕雖歡娛
迴溯多神傷松柏摧爲薪
誰云久不忘願言合志
儔以身爲津梁頓釋岐路
悲四海鮮徬徨

原缺

五君咏

有引

五君皆余友也其人有與余久交者有兩
家先世稱莫逆交及余神交者皆余友也
凡我故人有富貴者余槩不先寄書昔漂
陽當國會十寄書而余九不答或曰公亦
可以止矣漂陽曰在巢民可以不答而我
不可以不寄邈哉斯語安可更得之今日
哉阮亭公以乙巳初秋內召入都與此五
君最善因于送別座上各作一詩以見余

意或亦不必寄元耶

程周量舍人

南海甲天下浩淼凌氛埃
戔戔越王城中有鬱孤
臺千載得舍人曠代稱大才
射策冠南宮若然金門開
西風制玉爪氣蓋鄒與枚
珠江諸女兒美者顏如瑰
笑謁青羊君滿把羅浮梅
每吟程曉詩諷味常千回
晚節官秘書列宿依中台
黃山與五柞簪筆恒追陪
前年陸賈裝曾到蕪城隍
賦詩一相送目斷清江苔
復枉尺素書遠從姑孰來
相思結

中腸緯繡疇能裁遠望蒼梧雲水碧空徘徊

米紫來進士

前朝萬曆間六宇猶安康懷鉛入京洛健者相激
昂礪石推輿區鋒銳不可當維時米先生領袖翰
墨塲名園構輦下花木深且蒼華燈耀九枝歷歷
搖壁璫女紅織作奇別自爲流黃物物皆氏米瑰
麗非尋常瘦石與孤菊畫筆通微茫更有女針神
能繪旃檀王五筆具妙好光明照縹緗余父官皇
華讀書六庫堂辱公交最歡從游如葛疆歸來聚

子姓說向秋宵長暨余舞象年頗能蠟鳳凰幽花
吐並頭馥若曼陀香飛書走海甸遍索諸名章獨
有米先生擲地皆琳琅吳綾滑似脂細字春繭僵
皇天惡老醜萬事成悲涼轉盼四十年疇昔安能
詳側聞文孫才已壓大父行揮毫鑠任沈灑藻凌
班張我有生平交最數劉與王建安號七子與君
相頡頏安得乘秋風吹我置君傍張燈一話舊再
見前賢狂

劉公勇

識

樞部

青青江上楓湛湛江中水望遠一流想所思清潁
尾我思彼劉君誅茅在於此才同俠者流靜又類
高士憶昔初結交相遇秦淮市藉卉飲新亭河山
倏然異是時庾元規出頓中原轡君獨任叅佐抵
掌天下事一別各參商離別從此始順治丁亥年
余方歸井里閭巷斷樵蘇階除蔽荆杞節使坐樓
船笳吹中流起大僚悉奔走縣官負弩矢諸公未
及謁首詢愚父子沉思蹶焉懼顛倒失意指何由
賤姓名獲入貴人耳柁後一見君乃始得所以在

再直至今舊歡何日繼一讀紫雲詩髣髴凌雲氣

汪茗文比部

汪侯性簡傲蕭散有規格讀書破兩漢飲酒盡一
石擾擾崇文街浮雲羅第宅西有趙李家東有金
張室侯騎款段馬醉踏秋月白時於朱門前直拓
黃金戟十問九不應頗叢貴人責濟南王阮亭與
侯稱莫逆謫官一相見官醺恣浮拍衝雨特訪余
殷勤論疇昔邀我坐清川示我以文籍酒酣顧謂
余兩賢詎相厄論事見根據立說匪倚撫蒼蒼小

三吾中有雲烟積曾許過寒廬爲期在除夕成言
渺難遂零落如殘奕廣陵十絕句一字一追惜紅
牙檀板間位置我亦得恨不臨岐時爲侯一吹笛

吳園次水部

衰老都易忘對酒或翻記憶與吳均游此是幾年
事在者竹西路日日爲水戲是時龔合肥實爲人
望寄跌蕩愛古驪清遙有深致更有趙平原英英
負奇氣人如張長公姿比杜弘治浹日必具飲每
飲必大醉盤馬平山堂炙兔山光寺百金買管絃

千金聘歌伎君時善詩歌握管若飛轡余亦策駑
駘霜蹄免顛躓嗣後君過余浹月住深翠清談并
馬稍繾綣無不至轉盼成舊雨一往類秋蒂君已
踐清華壯年起爲吏嗟余老更狂姬姜日顛顛長
安諸貴游音問何由繼聞君曾寄書一道闊切意
詎料殷深源垂函悉棄置不見故人書矧乃書中
字念在切長懷撫今動深喟蒼蒼平原居化爲買
酒肆令子婚高門感君敦古義臨風附一言申之
以流涕

丙午晚秋再集葭園咏懷廣陵古蹟

分得
兼山

廣陵古無山何以今有山山以人姓畱居者康對
山對山正德朝峻偉絕躋攀損節與失官爲友甘
投閒浪遊到茲土凭陵遠闌闌崇阜蔭古樸曲磴
沿斗灣遙青矚江南四望橫烟鬟鴻去雪爪畱高
風堪起頑此山垂百年久假姓不還後來姚廷尉
承丘索于此耽矯矯鄭職方超戚友雙掩關金馬
言移諫垣直聲震兩間姚公我父執姻婭憐兒孱遂
得恣所遊登臨恒不慳天壤有王郎山陰稱墨憨

曾題讀書臺青天映蔚藍雲間董文敏縱筆飛紅

嵐康山建草堂文敏所手顏臺榭增崇迴香光深

林菴以茲山益輝遊者爭幽探猶憶驚座客

百俯史

視共雄談可憐倚樓人

友沂

寶瑟畱枕函忽忽數十

載公家殊不堪公子余季昆同余如委蠶將爲愚

公移難容彌勒龕今夕共冥搜緬懷安忍刪陳子

年其筆古妙應遜老夫諳追昔數勝遊不覺色爲殷

起視隋苑灰往事類觸蠻康姚嶽嶽姿千古照人

寰

丙午深秋述懷呈芝麓先生

讒言畏高張烈士傷懷抱皎日誰見明
瀾唇泰山倒我生嬰衆逆述之吻爲燥
趙竟讐杵嬰羊乃以酖告不聞郭元振
助喪逢客暴撥置勿復言聊一爲公道

其二

昌黎與眉山磨蠍坐身命我生胡最酷
七尺獨兼併傾人一片心報之以陷穽
破家割千金見少恒深病更苦多泛愛
推解出于性彼方起殺機我正

崇愛敬日處儔人所遇皆梟獍極念如我公讀
此安忍竟

其三

憶昔久別公念公苦難置有客長安行因附長安
字豈知尺素書累公尤自累近來焰日張橫攫無
不至咄咄人世中竟有此等事祇媿孱弱軀不足
供嚼噬

其四

古人盟車笠所以志不念今人驟富貴視舊如秋

霜惟公超古人蔭被滿遐荒知者與不知仰公如
太陽甕牖繩樞間無不沾輝光每驚唐突子無因
自相將及其賦歸來語公意浪浪始歎局促衷鮮
測江海汪我有弱羽毛卑飛在帝鄉待公拖翼深
妄冀成鳳凰

聽白瑩雙彈琵琶卽席書贈

我聞楓香調千載稱唐音宋有雨忽雷大小雙南
金白生擅此技拊指如龍吟憶余十年前聞之魂
不禁此來傾耳聽穆然春光深初彈如清琴再彈

鳴諸禽三彈萬物變聲響述所尋有時色失滌有
時月自沉有時風雨交長嘯搖寒林衆竅恒怒張
對茲恐其瘖不知天地間何爲獲此心述哉古聲
遙絕技歎生今

將至吳門與陳階六黃門言懷先寄百韻

天啓丁卯夏與君年十七小試受殊知竦身騰翠
輶英風迴顧盼萬里猶俯拾文壇浪得名庚午以
病程丙子庚辰歲君絢卿雲筆闡牘寶雞林南宮
稱瑞霽余方執牛耳珠槃紛絡繹跌宕三吳間先
後咸呼吸今譽不足論勉旃從古質許與一諾重
應求千里卽朋友滿天下誰不稱膠漆先君鎮南
獄省覲循子職嬾殘煨芋邊遺蹤詢李泌辛巳歸
富春君擁雙鳬出雲間陸機妙桐鄉翁子匹相與

其文酒江山增麗色維時中原壞整頓鮮憑軾襄
樊調監軍先君秉師律殲賊數百萬左帥尤叵測
余歸干政府萬言動剛愎先君致政歸背水冀一
克壬午中副車薦辟辭鴻弋煌煌經國手無處堪
爲力甲申際崩圻吾臬遂荆棘先君避鹽官君復
治鄰域推解恒不倦捐金資貨殖俯仰百餘口僦
居憑蔭逸踰年棄小草與君共寢食金閭返醉李
顛倒肆狎暱二姜錢劉輩掛冠恐不亟天壤餘數
子旦夕難自必江左繼淪喪一時莽奔軼屢竄遭

殺掠險巇召危疾乙酉冬至夜一歎甦來翌流離
幸全歸侍親如古佛己丑遇邗上同君到下邑堂
上拜吾父床下撫兩姪深翠一片石至今思促膝
壬辰復二歎更生己三日上窮碧落際籍舒霖雨
臆癸巳兒娶姚令子迓周吉曾約爲婚姻兩世締
親密此後大椿喪悼怛成縮瑟遺棄諸萬有千世
如歸鳴聞君膺簡在蒼生待拂拭入直簪訐謨出
憲勞整飭垂綬及故人音書屢周恤八閩數年別
余貧已骨立築山名懸雷畫區延著述金盡朋友

散廉嘗徒抑抑更苦驚博施一在先仁術轉歎童子時悞師竇范德婚嫁殯葬事赴人如不及子弟競見聞僮僕勤訪緝更生益勇勵鬼神窺秘密囊索磬千金拯救踰伯什如是五十年中間罹兵賊那得如水火昏夜副諸急以此反爲禍循例構深嫉邴原詎受誣庾袞誰爲効無嫂詆陳平鳩人暴羊慝明明郭元振助錢逢客叱最慘杵嬰生反蒙趙朔繫三反百忍後事勢逾倒極昨夏更見君譚讌仍佳集茶薺未深言含沙來鬼蜮此中僅兩人

三載肆膏鎖，導虎必先俟。聚蛇咸擁騰，強梁任外侮。
侮門內幸寶，嗇豈知臘月朔。慘亾傷弱媳，四世偕
百年。伉儷終比翼，怛哉賢淑婦。三十懷孕卒，七孺
繞棺呼。老姑泪洸溢，我方傾閭閻。與彼獨快蚌，鵲嶽
嶽姚年伯直聲高。斗北疇昔稱靈光，兩人所矜式。
其後如鯛魚，餌濁恣狂獮。慈孝誣慘殺，沉枉白日
黑。牽訟盡男女，窮兇極羅織。鼓盆而覆盆，禾兒仰
天泣。臺憲知奇冤，郡邑耻惡習。大耋祖母命，褒然
如耳塞。年母正古稀，片言不相入。康成與子將，無

從解迷惑傷心思孝婦恐恃我理直鬻產厭羣欲
告貸過十鎰土室拜老母兩紀戶不出慘痛難自
容辭家付一默過江又逢君恰住如須室文姚杏
莫攀楊錢何處揖紉佩想伊人高冠夢我岌舊雨
儼如生語人慚自飾只有吳司成時時寄蘅苾丁
卯至戊申年踰四十一四十二年交遺種不多得
况復與齊年加二便六十升沉豈殊態心盟老車
笠廻想鴻鵠志受瘳于蟣蝨喜君雙足健顧我足
果失繩纏盡平生活蕩付追憶

壽李母于太夫人七十并祝令子書雲黃門

五十詩

三山閼神彩華陽接仙源地靈萃金沙毓秀于公
門太母琪樹姿仙李並蟠根自登中丞堂一家如
春溫詩書既綜貫婦道自能敦卓識邁巾幗豈惟
縈蘋蘩雞鳴佐君子淑德難具論繞膝富鸞雛威
鳳尤絕倫十年郎署間含香奉至尊偉績衆所見
帝簡置梧垣苟利于社稷所知無不言饑溺切肌
膚積誠通九闕但使正學行名譽意不存開渠灌

斥鹵

前年疏請濬揚屬
運河商民交利

抑洪拯墊昏

去歲疏請塞
諸壩以抑黃

流濟川之
功甚茂

指掌陳利害桑梓沾生恩紀山仰五嶽

問水溯崑崙令嗣所設施靡不由坤元仲春麗鶯

花太母觴朱軒去臘望京華狐瑞先騰騫踰月雙

獻壽森桂復文孫翳余忝世講忍辱守丘園雉壇

揖諸謝敢謂叶簷墳一別五六年邇交有本根豈

少漫視人閉門如孤村穉子業太學光被晦朝曦

具言功業懋淪洽佩弗諼中外瞻婺輝長照北堂

護

蔣丹生持四書會纂過訪適當杜門謝客幾
不能荅黃僊裳有贈步韻四首應之

夙志浩金石剝落與天傭耕耘怡淡蕩歸臥拓軒
窗仙人共撫拍笑看桃花紅水繪水無際庭榭如
孤蓬到門無凡賓賓至啓雲封海嶽傾四座平生
此心胸

如此二十年井水波瀾起譏巧伏几席反覆傷內
美始歎炫華非徒乖聖賢理鑄戶悔昔悞晚遇見
吾子求聲忽反舌得無太疑似六十病且貧增傷

兼誓止

古顏昧正學乃君闡其幽似續千古源不屑今名

流四子朱大儒討析歸繭抽誰能于微茫畫理如

純鈞倚蓋有黃徐酬唱同僊舟

僊裳唐山館下在邑咸與丹生善

昔錢與楊述作我同遊

四子之學吾友吉士維斗最精

荆溪陳太保風烈前人真令子與文孫深交共賤

貧每歎髯絕倫散朗非時人有童雅擅歌追隨徇

知音離苦閨兩歲惆悵雍門琴歸語攜童來毋使

酒孤斟

月生陽羨人因憶其年不能已

訪周靜香于花谿草堂述寄

古吳百花洲吳王採蓮藪更有百花谿戴顒聽鶯
久鶯花兩寂寞遂落千古後舊遊得周郎烟霞環
戶牖空碧上衣裳白雲滿身手相洽丘中趣遂訂
平生友經綸當草昧風雲乃結綬大郡拜梁園賜
履青齊受逍遙返初服林下亦曾有高臥此花谿
于世如敝帚庭前峙丹嶂堂下流清澗宛轉入虛
白謨觴充二酉泓穎旣精良潑墨倪黃偶門後最
幽勝蔬圃拓渠畝雲間董文敏大書載柑酒青山

湧其前浮圖矗其右過訪正春融四面呈花柳怡
然竟忘歸願作並耕叟繫我匱水繪力田養老母
廿載杜蓬門何事關人口強來遂此遊况復故人
厚人生適意事于君得八九他時洗鉢遊共聽霜
鐘吼

答謝劉公勇考功卽次壽老母古詩原韻

生平無三事朋友與父母吏部堅貞姿誼同金石
壽片言遂定交愛我忘老醜伊予多感激春胸類
杵臼削跡翻自怡鑿坯祇羞考今年母八旬余亦

皤然叟末俗鄙賤貧誰爲訂皓首公時直金門荷
衣隔華綬乃獨軫窮交此誼見操守珠玉溢縹緗
於公徵至厚旣用承母歡兼以勵俗詬公平尤念
我兒子荷誨誘翹首望國門寒星太如斗

巢民詩集卷二

雉皋冒襄辟疆著

七言古

天邊行步杜少陵韻二首

天邊有朱鳳迴翔不可得
雛靈引首向大荒九結
悲鳴哽復哭我聞南方足
僊糧桐花竹實紛西蜀
况復青城厭芝髓千尺菁
葱搖玉木自從鳳去覆
巢空飽睖橫空墜黃鵠驚
驚蹭蹬鸞鷟斥鳳兮鳳
兮長太息

天邊何人歸不得
昊天四望放聲哭
大椿摧榮白日凋
魂逐杜鵑入巴蜀
吁嗟乎鳥生九子皆返哺
我獨何爲愴風木
搜身化作五尺鵠
飛上松楸叫白雲
皇天冥漠無消息

野桑爲大風所折
離披復生舟行同
無忝感賦其限少
陵柑樹爲風雨所
拔歎韻

濃桑蠹雲長河前
莽風倒拉慳彭年
龍蛇轆轤下垂地
朱夏不來齊女蟬
之歎之生惟所至
一物餘生藉元氣
豈知摧折寓生成
枝枝別出扶疎意
推

蓬觸眼非恆愛柴車輪覆紛青蓋誅茅小室倚斜
雲草碧無情悄天籟我生何爲挺荆棘偃蹇支離
淚沾臆置汝樽里樂園中倪迂着筆生顏色

與無忝式九披閱趙松雪高士苦吟圖卽席

限杜工部奉先劉少府新畫山水障歌韻
墨雲倒擁蒼輪樹四月重陰似淞霧同人清暇恣
冥搜吟詩并討畫中趣架上淋漓畫無數松雪寫
生天巧遇披圖古采晉精神嘔血枯哦迸豪素古
人匠意精且虔豈徒潑翠還流丹卽如此圖繪高

士筆墨空際爲攀轅老僧愁挂竹如意龐眉苦瘦
如清猿境沈心荒化工急鬼神潛活乘虛入竹粉
失翠枯藤濕六丁鑿秀心肝泣賴有傳瓷披簡人
雙鬟短後咸清立踢翻天地畫中濶喚醒詩脾恨
毫末夙世前身竟誰是頓令詩畫歸生活伐毛髓
誰可比始知昨夜澆濁金石之高吟搖膝更翻入
畫裏闌風長雨不知夏憐澹玳鏤任吾子盪胸黃
海雲極目齊雲寺無畫以前歸漠漠不如古鑄觀
無始

乙未初秋步譚玉章過訪見貽原韻

孤松鬱鬱俯蒼巖
短鬚枯髯愧桃李
春風不榮冰雪物
斯世何人更汝爾
菰蘆忽發三日香
惠而好我有沅芷
天才冠世顏冠玉
篝燈細語咸虛已
琴劍橫陳管寧榻
盡日論詩兼論史
惜別無言淚綆縻
思君夢破中宵起

久病強起與無忝緯之坐得全堂論書移日
夜窗初啓無忝遙見獨樹蒼鬱狀如雲僊
鬚眉畢具亟詢余余凝睇久之歎曰非雲

也非僊也乃前吏部公宅中樹影也樹猶
如此人可知矣黃子落筆爲圖戴子作歌
余力疾悽然屬和

拒病開軒揖二客烟霧雷霆沾袖石空堂鬼泣辨
六書夜色黑離銷遠碧遲鐙待酒倚檐楹當窗老
樹參天隔戴子疑眸忽大叫遙聞樹上僊人賸主
人短視小奚驚競指睂目虬髯笑又云肩上補葫
蘆左手蟠桃右手壺衣葉當風不自扶蒼奇縹緲
神有無我來審視良躊躇忽然精彩生尺素黃子

索筆爲之圖戴子驚問此樹誰家莽蕭颯我與黃
子慘澹摧心不能答當年鐘鼎舊山公鉅筆洪音
何鞿輅山公弱冠峙魏科文章氣節俱嵯峨餘事
風流及華屋幾年雕畫嬌笙歌忽然辟地甘棄宅
公也游龍神不測乘槎犯斗疑挾鬼神遊遙聞奉
使籌時日已昇歸來一顧無留色長松勁節英雄
識蕭條復去今何之檠戟樓臺任荊棘獨畱此樹
捎空矗漢元氣扶上臨日月下楷模精靈直與崙
者接儒耶樹耶猶顧吾吁嗟乎浮雲變態何不有

不侶僊人寧侶狗

贈蘇克廉歌

蘇克廉爾何奇今年五十稱介眉卅載詞壇駕六
螭文章古博摹敦彝珣鍤冥漠窮何思清深一氣
吐欲知青天萬里舒嘯遲胡爲逐隊里閑兒雜沓
綠蔬與江籬玉川真癖清滿瓷壺匱光澤凝柔脂
液金寶色石榴皮閒燒鷓鴣紛蜜脾茗香雙擅天
所私手揮五絃孤鴻飛有時妙飲不知饑晨昏倒
傾三百杯沈酣更酌轉自怡喜怒醉醒恒難窺舉

案有婦通精微大兒磊落小兒奇妙德先生友鹿
麋遊山造竹同吾居亂世浮生真有涯善爲無益
相娛嬉富貴笑殺長安基轉憶舞象共追隨君之
伯兄爲吾師鬪才角藝雷電馳聯璧人稱雙紫芝
卽今半百方朝曦

讀石月川危垣爲積雨所傾歎援筆示慰兼



尊甫夏宗



石子十九內行積清夜考心無跼蹐讀書攻苦惜
寸陰兩世與我輸肝膈昨夜雷雨連二旬葯房斂

睡正橫陳崇雉高墉忽頓擗千鈞萬石迸其身此
時卽有拔山扛鼎巨人力何法盤旋當逼側六丁
効命鬼神扶木榻團迴雙菴翼堂上驚號傷九歿
震鄰老幼踉蹌起掀翻瓦礫透出來突婦未嘗傷
一指吁嗟人生總是血肉軀誰能尺寸櫻肌膚從
古巖墻惕知命曾于石子何有乎始歎世人橫逆
不造命嗜慾身心憚嚴敬尸行肉走自倒顛不傾
不危投陷穽石家父子動皇天星辰一絲豈偶然
我亦數歿不歿者就木庚生又八年

寄贈譚玉章太史

賤子結髮慕風雅寸心獨折譚友夏先君坐鎮海
雲深循卓首推譚隱林竟陵城下湖山倩寒河諸
子多相見果然譚氏好兒郎最是楚人工婉孌玉
章姣好稱少年十九謁帝金閨前春月傀俄名士
態烟江膩滑孝廉船細憶乙未秋西風七八月干
城白草生一片黃沙沒此時賤子家居時紛紛賓
客傾魏其譚君自爲故人至故人於我多微詞故
人亦有平原酒故人黃金過北斗欲買男兒一寸

心不教濫過銅街走譚君碎裂鸚鵡杯黃金於我
何有哉扣余之門謁余榻幽花瘦石精神開撐腸
拄腹那能語海色東南莽如許君言盡室必歸吳
我意空拳定張楚別來倏忽四五秋君已入直銅
龍樓褒公鄂公求識面岐王壽王相唱酬我今匿
影江城下此生自是蒼茫者夜醉偏容亭長喚晨
出時遭里兒罵昨冬蜂蠆敢細論論之恐復愁心
魂摩訶山下土花紫老淚添來痕復痕長安春雪
打頭壓感君六寄長安劄作書娓娓見交情念我

殷殷得家法躊躇顧慮真無端反覆讀之千萬盤
我交海內三世數十載胡乃得爾傾心肝白頭人
青門裏板輿園內蓄甘旨兩弟跳虎頗自喜大兒
善病耽筆紙小兒嗜古入骨髓影梅菴後草枯矣
殘年啖飯看牧豕眼中之人吾望子

其年暫返陽羨出戴梅屋新畫小像索贊卽
席走筆題贈

陳子與我形神相接幾三月才鋒意蘊交相竭別
歸手剪一幅雲索題小照見毫髮陳子陳子我與

爾豈面貌交何難寫爾玉樹千尋千雲捎但恐異
才天授鬼神泣異書讀盡參次參斯非才盡所能
述徒令神龍老鶴空天喬請與聊徑述小言詹詹
不厭質我交與爾四世六十年年譜盟書難盡言
愛爾利筆追風如陳俊擊銅馬短兵所向無敵也
又如陳蕃欲與天爭漢鼎歸掃除天下豪端瀉置
君百尺樓上頭文才膽志儔者寡一朝撞碎千金
琴變雅文章山水深褫褐風塵走江左吾亭顧我
稱知音長髯過腹三四尺豐背栽肩如截瑩戴生

年少妙傳神飛天仙入下瑤碧豈但文章莫比倫
受電甘霜一寸心江湖萬古多才子星斗蟠胸是
鉅人我之貌爾僅如此爾試視余何所似荒天老
日東海濱獨立蒼茫擲書史

逸園放生池歌

有引

天啓癸亥春先祖奉直公禦蜀解組歸里
締逸園于洗鉢池上池廣十畝澄泓淵潔
數十年不竭邑先達郭兵憲故物也先祖
欲爲通邑廣放生兵憲子典客遂割以售

巢民詩集

卷二

庚子

逸園橋外又池五畝爲錢京兆廢區并售
之始得泝其流于河先祖居鄉居官七十
年晚歲重膺紫誥終身不置產一畝此汪
洋二池十五畝則先祖遺澤與通邑共活
億萬生命子孫守之四世三十八年者也
滄桑後先大夫與余人外一無所營惟三
修逸園放生池先大夫歿余復與兩兒易
對岸水繪園爲菴繞池夾面以護之雖不
敢忘祖父好生一念亦仍欲與通邑廣同

善之樂也去夏鄰園忽易主越疆踰畔實
逼處此余方捨宅何問尺寸已亥春平地
大鑿陂塘逶迤而出競設桔槔人力如虎
聲響成雷數十年泓澄湍滌不竭之澤未
一月而池身龜拆焉鱗介之屬大者人立
小者丘積鄰人百十成羣挺义負簪簪呼
取之不遺鯢鮪余目慘心摧不敢問卽邑
令君李公聞之兩過其地爲之長太息而
已客自四方至與戚友來觀者皆眦裂髮

指叩余何以不言嗟乎余匪不能言匪不敢言念先人席極盛時世以靡爭忿怨自處改革後余十七年來詬唾到門及面未常與人色忤川之盈竭因時物之歿生有數余瘖久矣安能于事勢情理之外與人問諸水濱哉然追念祖澤不能已託之長歌以志今昔海內好我者咸望惠以一言嗚呼此池遺事恐重論嗚呼此池遺事恐勿論憶昔家居通德里大父抽簪還脫屣夢裏猶尋劔閣

雲眼中只愛巴陵水
逸園數畝恣徜徉
修竹文蘿步屨香
江山却闢朱門麗
絲管偏容白髮狂
亭前圓浪鋪平縠
暮暮朝朝一池綠
欲向君王乞鑑湖
敢論恩澤邀湯沐
邑中前輩郭汾陽
許割烟波到畫堂
行人盡識平泉宅
過者爭言沁水莊
齊魯樊勞百戰余
父監軍白羽箭
賊退家園俞暫歸
功成子舍能無戀
十年桑海賦歸歟
清泉止水航閒居
曲館怕聽衡嶽雁
方塘還種武昌魚
吾家累世行陰德
精誠內結魚能識
清渠一邑共生機
百頃

風潭成樂國逸園平對小三吾我爲高堂拓一區
自從親歿傷烏哺易菴常與僧人俱可憐陵谷時
時徒只有芳池日瀾瀾肯效豫且困白龍殊喜琴
高騎赤鯉百年物態無事無枯槔聲發春水枯忍
見鷓鴣天外擲還恐鰕鮒肆上居我意茫茫誰識
此四世相傳惟此水有鄰暴興恐相尤千金難買
吾望爾君不見金盤昨夜宴東鄰大魚人立不敢
噉又不見銀塘新水碧粼粼頓令鄰壑揚飛塵土
人洗眼月東出嗟我卑靡縮瑟人

和譚灌湘太史寄張螺浮黃門兼懷東臯歌
幾年不見故人面聞君獨立承明殿幾年常接故
人書江樓日烹紅鯉魚男兒致身苦不蚤羨君已
握金光草男兒結交苦不多羨君獨與貧交好今
年八月秋嵯峨此時才子江南多盡攜鼓瑟湘靈
曲來應宏詞博學科秦淮橋下月如水主司聞是
歐陽子撾鼓還登石子岡吹簫更上華林里余也
青鞵布襪人幾回隋苑立逡巡每因梅蕊時憑檻
只爲桃花一問津瓦官閣下江帆疾南來贈我江

東集中爲張衡一賦詩詩中賤子勞相憶擬金伐
鼓下揚州好爲雷塘十日畱張衡聞說明朝至與
爾狂歌杜牧樓

客邦上王阮亭使君以洗象繡鷹天馬雙松
諸古風見示歌以贈之

燕臺雪花大如尺金張寶馬夜相索此時王侯無
酒錢不識城南與城北袖中十丈紅珊瑚瓊瑤翡
翠隋侯珠煜如海客販韎韐麗若貴士垂流蘇五
月金河綠波漾赤欄橋畔人相向象奴不動如山

來噴沫騰波蹙烟浪王侯此時筆有神長歌短律
飛嶙峋盤空硬句落天外斬絕森秀羅天面雲間
針神古無比細緝吳綾如蟣子角鷹繡出三尺長
翠距愁人鎮相視傅家白面稱小侯雕鞍寶憶成
春遊驟驪天馬汗流血不數昔日琬馬驪王侯酒
酣據地叫磊落千言何絕妙有如六博成梟盧擲
帽自言袁彥道君不見幽州馬客紅氍毹滑臺儀
同繡螯弧長安城中十萬戶誰人能作湖就姑又
不見南朝子弟好絲竹輕衣夜過五陵宿誰數揮

毫陸士衡只憐傅粉何平叔那知王侯骨格奇賦
詩往往吹燠篲盤中中央周四角何用索米長安
爲官閒晨起金門裏屏幃千巖與萬水翠鬣霜皮
飽十圍誰人筆下落松子更欲賦之鵝谿紙杜陵
歌行自茲始

宜銅爐歌爲方坦菴年伯賦

龍眠先生鬚髯皓兩朝鼎貴稱鳴珂絲綸世掌遭
遷播邦江賣字書擘窠生平嗜古入骨髓玩好不
惜三婆娑有爐光怪真異絕肌膩肉好神清和窄

邊蚰耳藏經色黃雲隱躍窮瑯磨窪隆豐殺中規
矩紅榴甘黛紛雷蚪我時捧視驚未有精光迸出
呼奈何恭聞此爐始宣廟制器尚象勤搜羅宮閨
風雅厭奇巧爐構精妙無偏頗或云流烏一夜鑄
寶藏首陽銅枯汁流酤或云煉銅十二取輕液式
倣官瓷非鬲犧彝乳花邊稱最上魚蚰諸耳無相
過博山睡鴨真俗醜宋燒江製咸差訛工倅撥臘
昭千古香籠火煖浮金波宜香宜火宜几席寧惟
鑒賞堪吟哦百金重購擬和璧旃檀函貯文犀馱

後來北鑄并南鑄道南施蔡皆么魔亂真火色終

枯槁磨治雕鑿蛟龍呵平生真賞惟懺閣同我最

微底眼力

好沈江河撫今追昔再三歎憐汝不異諸銅駝一

爐非小關一代列聖德澤相漸摩我今為公作此

色好景廣

歌萬事一往何其多歌成乞公書大字明日且換

山陰鵝

杜參村二部定煙亭故以約註行之如少陵題馬詩歌
集字不虛下之詩後尤絕似不若右歌歌

水繪菴六憶歌

憶洗鉢池放生魚 憶懸雷山後峭壁

憶小三吾亭前古松 憶小三吾迴環水

道 憶畫堤夾岸桃花 憶隔岸垂楊

各有六憶小記刻文集內

永繪百年稱隱谷主人舊是先祖叔先祖逸園臨
古潭紅樓碧閣枕東南西北水繪水無際占樹參
天雲日翳吾祖構池廣放生洗鉢池魚四十歲滄
桑旣改喬木摧龍攀虎跛俱隕厖大阮廢箸并相
屬余易爲菴存劫灰是時人家苦兵燹古石迸落
隨人輦况復吾家有石倉好爲無益成絕獻不特
移石兼移松九鬣蒼鱗蟠老龍撫松一望歎寥泬
霜嚴翠冷聆寒鐘枕烟亭前雲屏崩月魚基後峭
壁立古香百樹繞山腰大唐之頌堪重勒二十年

前遠觀親衡湘勝遊真絕倫道州古銘特奇秀三
吾小影摹前人洗鉢泓油抱寒碧唐亭孤峙水中
石左渡長虹汾藕花右通小月浯溪繹百畝之內
無繚垣層溪淺渚生波濶斜風細雨掠舟入不許
漁人把釣竿畫堤夾鏡桃花水面面桃花紅似女
弄姿逞態無不爲掩映垂楊颺他嶼弱冠城南便
結巢如今老去重誅茅自謂餘生狎鷗鷺取諸天
地如空匏那知山崩復水竭高者使傾生者滅亭
畔秦封幻化無岸上秦花春水絕東鄰占斷小浯

溪西鄰斫倒垂楊低烟水烟絲空極目萬物於我
如醢雞吁嗟百年一杯酒自有無者無不有伊何
爲彼孰是吾悔勒吾銘師漫叟諸君爭放六憶歌
余爲小記更吟哦鉢池祖澤柰魚何

夏寒行

六月八日穿縻絲縻絲中裹夾繒衣夜擁薄絮不
得熱手持綾扇何曾揮頻倚薰籠烘寶鴨日光曛
曛背溫洽豈是皇乾驅大火風蕭蕭寒雲吸呷或
者昨年雹未消冰車雪柱漫空壓我聞老農常言

中夏寒修綆繙井井底乾又聞六月陰森生積水
河裏撐船直入市旱澇殷憂兩不齊眼前二麥賤
如泥去年奇荒無一粒今年豐收百當十民窮金
盡金益貴官逋重征征轉急束手仰屋何所出天
亦慘悽六月蟄老我憂天天不知滿頭霜雪悲瘡
痍

東鄰行

東鄰老叟七十餘連雲之屋田上與持籌握算最
云得攢眉垢首恒歎無旣甘霜儉尅衣食更怡蕭

械仇笙竿青春白日去不返猛權子母鞭馳駒以
此纍積疲錙銖俗眼滔滔羨充腴豈意春來化灰
燼旋于長夏捐身軀一身之外原莫益周身之具
何難圖有田不能名一錢有錢且畱飽妻孥雙手
欲伸不得出滿心憤恨形凋枯七十年來如是夫
人生朝夕同蟪蛄道傍咸能爲彼吁那知吁者同
其愚曷爲吁者愚彼尚擁貲稱鉅萬彼尚享年七
十餘眼前鹿鹿不稱意萬一蚤歿胡爲乎勸君浩
蕩捐一切陶然清興發江湖

西鄰行

西鄰老人長八尺虎氣虬髯莽形魄少年白手要
財雄攤身致富稱錢癖石崇百道善營生王戎計
算到李核標錢穴金數十年矍然闖然神鬼役忽
然符鶴耽箕仙晝夜茫茫如速客不知仙人何所
言白撰朱提頓不惜發廩指困擴捨施衣食于路
待枵瘠略約逼側皆坦夷紺殿旃林互金碧只謂
能聚亦能散那知窟地仍厚積銅墻鐵壁久塵封
內屋充盈秘柴欄一朝掘開大心驚完封不動無

踪跡當時密宰且深堅不意此君生六翮我聞中
金之氣夜流白撥隨手散復如液不貪夜識真有
形屈伸往來隨所易又聞少昊之時金鳴銀涌自
流渚龜蛇呈形人鬼劇是物流毒不可窮妄取絲
毫償千百五倫因此成順逆仁義忽變爲盜跖若
終身徇亦甘心何當八極潛揮斥幾年市義應有
憑滿眼仙人難考覈君不見郭巨埋兒金出塵葛
家孝女魂化銀造物暗移是爾福不然禍發傷其
身

病中偶然放歌

生歿貧賤中此外無一物有身始覺有貧賤此身
究竟成何物功名富貴真可哀無端着人如纖埃
纖埃尚紛紛富貴何有同浮雲忽然橫金玉忽然
銘鼎勲總于子然無所文生不滿尺歿七尺中有
一寸如火赤千年萬年化爲碧人生偶然付一擲

懷張孺子歌

柴門日日開門開日日人往回偏我意中人不見
睜眼欲暗心徘徊心徘徊心轉哀癡肥萬事稱心

意秀削滿面皆塵灰誰令吾子負此才悵望麻衣
帶雪來

畢載積使君古硯歌

昔聞東坡一鳳唼黃理赤文誇獨貴哀玉泠泠迥
絕塵却與鴻才增意氣放翁有硯更奇哉中藏光
怪驅風霾眼前閱歷少知己名山巨浪甘沉埋忽
然擬託琳瑯士文光熊熊透波裏絕似珊瑚鐵網
收英英肯與庸流比青齊才子推畢君畢萬之後
天下聞司農門閥原華胄刺史風流更軼羣銀黃

艾綬五雜組蒲車蒞任江之潯山簡高風化俗深
墨雲能作蒼生雨倚歟項子詢知人贈君此硯情
最親紅絲細帶清波滑鵲服還涵絳露春羨茲古
硯終不灰羨君新詩絕世才人生遇合本有定白
服豈受時人猜君不見劉家更生侍石渠青藜夜
火輝蟾蜍君持此硯獻天子好上金泥玉檢書

寄壽總憲龔芝麓先生五十歌

白玉河邊玉露流黃金闕下金風秋西臺獨對麒
麟殿南陌斜通鳩鵲樓重輪再獻清河頌越裳韞

譯皆來貢三府規模物望尊百僚彈壓威名重我
公嶽嶽領崇班繡斧珠袍讐百蠻西宮品秩荀文
若南國風流庾子山蓬萊清淺那如故世間又值
公初度綠髻能令將相驚朱顏最得君王顧君王
笑坐柏梁臺飛騎黃封絡繹催三聲仙樂翻供奉
十部宮林舞善財江東賓客如雲盛獨憐賤子埋
名姓萬事蒼茫那得知八年離合誰能定伯勞東
去燕西飛君作公孤我布衣愁中廚顧人誰在夢
裏關河事已非憶君同看隋堤月隋堤明月圓還

缺憶君同賦冶城秋色不勝愁攀條我類

桓宣武吹笛人思趙倚樓

謂友沂也

余年四十邗溝住

珠璣踞誦詩千句才盡方知白雪難情深翻使朱
絃誤都門嶽降會夔龍退食鳴珂更擊鐘相遲新
繁沙堤後同訪秦碑五老松

太舅許公九十大壽歌

吾家老母太恭人七十有六如青春呼兒呼孫具
康爵競偕內外祝長庚大姨張母八十二小姨蘇
母比兒五十有五長一辰白眉二舅七十三第五

阿舅亦七旬是日六月十有九許家渭陽九十慶

靈椿各率四世陳錦茵九十太翁南面坐更有八

十有二之太母稱如賓三鳳繞膝皆奇英孫枝琳

瑯席上珍獨有中鳳五十未有雛前月孔釋送石

麟猶子叔重魁五經

指忠節公同堂弟
茹庸先輩提辛卯

諸孫丁卯

堪比倫

公與弟季和八十五翁孿生于余高祖姑
季和公又匹余祖姑生孫山濤詩文佳絕

太翁一一相逢迎喬松凌雪尤堅貞俯視耆耄皆

外生太翁向余獨細說我見爾家九十八十之高

曾

先高祖雙橋公夫婦雙壽九
十三先曾祖參軍公七十七

爾之高祖九十有

三是余舅余復九十爾母爲余之女甥君家世世
渭陽情今更見爾爲人祖七世歷歷何分明滄桑
在世人在眼昔何烜赫今何屯憶昔爾父真冰清

南京考功坐鶴廳

先憲副會官
天官考功郎

吾姪姪婿咸玉尺

山公啓事同崢嶸

公姪忠節公以考功員外郎殉
難隴西公俱先後爲文選主政

竹林門楣兩殉節爾父歸隱終賤貧爾復養母甘

躬耕遺榮不負北山銘我今爲爾母子酌一斗更

爲諸甥傾大觥孿生有弟八十五忠節之父八十

有九余從兄隗余何德壽獨增爾爲長歌述此事

試看爾祖爾伯高文雙在屏

公六十壽文乃先祖
七十一歲奉直公筆

八十壽文乃先伯明經

八十三歲處冲公筆

湘中閣同阮亭先生望雨歌

我昔遊瀟湘最愛瀟湘雨瀟湘一別三十年暮烟
欲見青難補山腰小閣署湘中四溪一碧將無同
捉塵有人喜深坐日日來看桃花紅桃花片片嬌
紅濕輕烟織水鮫人泣枝峰蔓壑樹槎枒蒼涼綠
滴吹牕入是日幽靜不可言遊人屐阻空煩喧推
牕忽憶三湘景米家畫裏聽秋猿

三舟圖歌王西樵司勳屬賦

西湖之水清且妍藕花荷葉紛田田碧琉璃滑光
可憐魚村蟹舍相芊綿中有好山橫鏡前流紅潑
黛明而鮮三舟者誰湖上眠烟消月出不見還太
常矯矯真神仙顏唐玉山倒瓊筵醉着只釣槎頭
鱖觀察好客如鄭玄沈酒不惜青銅錢有時一飲
成百篇司勳吟咏清且圓長齋繡佛天下傳一杯
入手神明全三舟滅沒斷復聯幽人秋水爭嫵媚
畫師好手追黃荃妙意渲染最雕鐫我披此圖百

態捐耳畔恍惚聞潺湲君不見白公蘇公已緬邈
何可今世無此賢千載而下爲泫然

送別程明士

程君一生湖海客慷慨悲歌古無匹當代誰人更
遊俠意氣縱橫稱第一余也愁病隋堤別片言相
託成膠漆憶昔君家蜚語連竹林大阮真可憐孤
身七入蜚狐塞獨夜長歌猛虎篇保孤全宗果不
易此事已有千人傳月明跌蕩旗亭肆握手秋宵
論往事闕下將爲汗漫遊座間不露英雄氣余也

有子趨燕臺何時振翮還歸來託君之語語何驟
此意敢望常人哉西風蕭蕭日將夕滿目飄歌留
不得爲我須乾白玉壺因君一拓黃金戟

贈叢含英孝廉三十歌

鶯花天氣何鮮新柳絲毵毵飄颻塵此時逢君正
三十祝君兼送城南春人生富貴亦何有羨爾芳
名滿人口冲懷恰似萬石君讀書更比朱伯厚春
波漸上孝廉船廚中櫻筍還開筵絕宜縱飲當三
月况復看花蚤十年高才盛事兼好景逸足驂騑

會須騁今年醉君紅玉壺明年喫君紅綾餅

已酉榴月白璧雙正五十過余彈琵琶數日
于其歸索詩壽其母夫人八十卽席放歌
贈之

白君才雋毓名家獨耽聲調彈琵琶琵琶于技殊
小巧君彈琵琶狎瑤島緱嶺子晉下鶴聽飛瓊雙
成不復道手持琵琶上高堂高堂母稱八十觴一
觴一曲曲未央庭幃真樂疇能方况復君年正五
十榴花滿把生紅光吾母今冬亦八十朝夕承歡

如不及萊子七十始嬰兒我輩向母索飲食人生
萬事堪一笑鐘鼎悞人成不孝君歌我舞繞膝前
世間誰者真神僊

戊申三月三日吳門遊山行八首

觀音山前雨一月偏我來遊罄豪髮筍輿穿碧歷
巉巖斗轉寒山千尺雪風雅凋殘山水幽春行蕭
槭如深秋閒情麗矚交相引老我何當遂此遊

三十年前曾屢過天水園亭綠可唾敦彝篆籀古
紛披美人香草情何那竭來空谷孤人琴只有青
山不曾破珍珠萬斛湧晴簾我盟白水來枯坐

寒山迸石羣雲眠寒山野花奇難箋寒石寒花嘗
在眼主人何詎稱前賢寺署報恩誰作頌以山貽

人恩莫重我學愚公谷未成欲移此山安得動

泓油瀉玉澄明鏡菴轉法螺尤妙靚簷際山根橫
冷香拘鐵盤銅堅古性背山一碧竹樹寒坐看登
頓繞巔屹黃鸝數囀海棠睡忽然雜佩聲珊珊

有女如雲中婦艷烟視媚行雙玉倩深深拜佛款
款行澹墨新茶籠素練輸他暖玉不曾香呪殺桃
花無此面杳然一去千山春雲起車迴驚復見

雲間前輩尊陳董余年十四歸藥籠長白先生雄
茂苑文敏導之稱李孔恣遊研北與書巢仰天萬

笏瞻龍從三公旣往余何之獨上天屏看蠨螋
天屏疊翠矗千尺拔地蒼涼映天碧橫披陡削會
奔崩搔首一問動魂魄山腰有洞湧蓮花白雲菴
裏多谿衲何必五嶽始埋照跂足小憩真吾家
吾家築山栖水繪廿年遺世甘蟬蛻皇乾不許人
遞肥乃有二物爲之害出門真如出岫雲倦鳥雖
飛不知外回首慈幃隔一江脉脉子情通地肺

百憂集行寄呈芝麓先生

我聞謝公言雙涕綆縻下中年已後哀樂多正賴

絲竹一陶寫又聞魏信陵乃是貴公子暮年遭讒
不自聊乃借醇酒自污耳嗟余數載喚奈何猝來
蜂蠆何其多無賴乃思託山水有恨猶且耽聲歌
八旬白髮高堂母幼弟雙雙繞衣走茹荼飲藥如
舍飴飲亦吞灰稱逸叟因思汗漫物外遊倒行逆
施真良謀人言我欲爲豪耳焉能知我中心愁只
今惡浪如山簸猶向黃牛容易過歌僮雜遣作馬
牛圍石憑風更搥破情深不覺爲公言公若聞之
增煩冤柳瓢巾拂吾生事終擬跼蹐祗樹園

贈竟陵胡省游川酬古篆之贈

竟陵才子羅烟雲豪酣落筆橫千軍紅椒紫蘭披
辛芬採之紉佩成氤氲脩然高隱還大文秋風屑
瑟多憂慙手鐫金石摹鳥紋屈強蟠拏留其筋商
盤孔鼎供奇雯自從石經芳草濱丞相中郎寂不
聞後之作者咸推君倚蓋相許情何殷示我古篆
真超羣刻畫精微不可云鸞停鵠峙蛟龍分紅閨
小字細如蟲世上諸子徒紛紛卽有奇巧皆妖氛
誰其銘鼎勒殊勲今君奏技稱入神我惟對此懷

巢民詩集

卷二

巳酉

典墳

二哀詩

光祿大夫兵部尚書謚襄敏三韓蔡公

有引

大司馬三韓魁吾蔡公于康熙十三年正月以
疾薨于邸第踰月始聞薨部下編民如梟冒襄
率子冒嘉穗丹書爲位而哭之卒哭思所以報
公者獨文章耳顧昭德之碑麗牲之石載在

國史藏諸幽宮有鴻鉅之椽筆在非余所敢任
也自念滄桑賸物荷公特達之知蓋昔年吳橋
閣學范文貞公爲南大司馬余與都督蔡公懷

真同出門下王師渡江懷真効順歸旗公實兄
事之家庭聚語賤姓名久在物色中及公開府
淮揚屢召未遑修謁僅以詩文報命卯辰兩按
部雉皋甫下車卽修式廬之典握手道故懽若
平生駐節水繪庵造膝連床不啻家人父子邑
巨室中蜚語余力白其冤反覆辨論申旦始得
請舊令中州李君素廉明以公事謹悞幾挂白
簡請于公得保全還里凡有商榷語不及私時
尚書撫軍林公少保提督楊公與公密坐水檻

聽余昌言咸賜採納林公推公愛霽顏下交尤
爲異數公督漕控轄七省其尊嚴倍他制府每
信使候問公傳呼直入內府令寢食几榻下首
起居余老母恭人次及余食息動定以至家門
內外必詳詢而後已鉢池勺水爲先祖奉直公
先大夫三世放生之地特置額題辭以表先澤
且禁不得施網罟焉公 請告家居兩兒夙蒙
觀風特拔後肄業成均肅謁里第公待以至情
優禮每召諸公子會食煦濡沫愉愉如也間

有餽遺留一二年必寄返之封識宛然邑戶室
入仕途謁公公款語數日特詳其隱微至今通
肺腑締姻婭皆公賜也公之云亡固所謂天枉
傾地維折者而余尤不勝知己之痛乃以老嬰
患難力竭心枯兩子憊于逋責漚于輿隸無從
一申走奠而公旋大褻泚淚和墨作輓詩一章
壽之梨棗以識千古不忘之誼公之靈旗應還
斗宿恐不忍聞七十衰殘嬰此奇窮極慘之遇
并嗣公大司馬大令侍衛三公見之知余片言

平生寸心千里于死生之際不敢少負于公也
詩曰

真人龍興鴨綠江白旄黃鉞徇八荒電掃流寇如
屠羊定鼎卜洛姬曆昌桓桓蔡公握鐵鎗雲從風
從豐沛鄉入叅帷幄出廟廊栢臺執法吏凜霜底
定秦豫平金姜南征北伐拓土疆建牙江右肅紀
綱勘亂定策招流亡手繪鄭圖排闥闥立蠲袁瑞
浮額糧鵝湖鹿洞闢講堂生徒誦肄聲琅琅臨江
高閣標滕王星分翼軫飛棟梁 帝念漕政資勵

勦特開制府鎮淮揚漕卒獍惡踰虎狼如山如嶽
立法詳舳舻銜尾連颿檣儲糈百萬輸京倉弓刀
按部落下邦駐節水繪同倘佯式廬造膝相扶將
肆筵授几傳盞觴天街貫索吐角芒邑屋大獄興
蕭牆奮髯中辨義激昂旋乾轉坤几榻旁景升豚
犬稱頡頏辱公謬許元季方屋烏愛及下走傖薰
風弱艸生春陽惟公德澤留甘棠萬間藉庇衰門
長懸車束馬鬢未蒼東山絲竹平泉莊台星夜隕
福曜藏身騎箕尾從先皇愍綸謚冊國史香雲

臺麟閣神翱翔泰山巖巖河湯湯帶礪萬古永不
忘江皋野老涕泗滂人之云亡我心傷寢門爲位
奠椒漿思報公恩惟文章輓歌聊當招沅湘傳芭
伐鼓震蜀岡公有令子耿鄧行手扶日轂迴扶桑
旂常竹帛日月光誓書冊府看煌煌魂歸來兮樂
且康雲旂飄搖掩攬搶

二哀詩

光祿大夫禮部尚書謚端毅合肥龔公

有引

芝麓先生以癸酉甲戌弱冠成進士卽出宰楚
靳時流賊蹂躪全楚靳當其衝公登陴固守民
効死力丙子分考楚闈與梅村九青兩先生共
持水鑒士之瓌奇盡歸藥籠此十年塲屋余雖
詭得詭失然三吳珠槃之會海內黨錮之名竊
附清流狎主齊晉與公雖未謀面聲氣相望千
里同風迨壬午秋余復中副車與機部漁仲長

人送漳浦先生戍五溪又與漁仲子一懷真趣
吳橋吾師赴召對威追隨壽州壽州方先生以
萬曆朝名御史又爲貂璫刀俎碩果其所許可
群爭拭目爲余言公英才大力吾道龍象旋從
紅樓得讀公與密之倡和諸詞畫風鏤月秦七
黃九無以過也諫垣風采折檻批鱗經歲讀公
讜論危言謂壽州不我欺益心許之矣滄桑後
余鹽官蒙難萬死一生還里戊子冬與公把手
邗上片語平生悲歌慷慨雪夜霜天咸卽席限

韻毫端奔涌江潮鏜鏘鐘鼓者十餘夜庚寅春
仍約聚邗縱酒賭詩不分晝夜者又百餘日時
公年三十六余正四十公爲金闥行數千言夫
人畫三湘九峽數十尺合卷合幅割花邊宣爐
兩爲余壽金闥行者蓋詳述宛姬從余始末倡
和詩中有十年朱雀路花月並亭亭又棲烏各
老長干柳爲余幸復自幸也公是秋以奉嘗還
朝閱辛卯而宛姬逝壬辰余死三日庚生公與
夫人悲喜不殊骨肉先寄爰沂書云慘聞辟疆

之訃豈脩文催赴玉樓耶抑宛君招魂去也酌
酒寫哀以寄腹車之痛惟代致之嗣聞返魂屢
書堅訂耦耕偕隱之約公旋以總憲鐫級奉使
粵東丙申丁酉邦上白下磕頭促膝清溪中秋
倡和不殊疇昔而眷戀過之自此衰門風波詬
誶迄今將二十年不可極公竭護持損眠食凡
公危疑顧慮爲之垂綆者余皆謝絕只以聽天
由命忍辱忘怨八字銷之丙午歸塋仍過邦關
時公聲名益震皈誠待命之人所至舟車擁塞

水陸一出而道路攀阻者數千人公皆質借千萬以厭之余送公茱萸灣不忍與公言別更不忍見公吐握之苦僅于筍輿中遙聲致隔岸官舫遂疾返公伏船窗放聲一慟余進城十里淚下不止後公寄詩云心折茱萸江一曲巾車南去布帆開又序云記丙午冬再別茱萸灣寒風淒緊遙眎不語車塵帆影至今搖搖心目間公念茲不忘豈知遂與公成永訣耶公謂余旣遺棄萬有自甘人外遂力招穗丹兩兒更番人戒

均厠門墻親爲教育扶植卽下及小童秦簫等
皆侍立座右贈以詩歌已酉冬老母恭人八十
壽特命穗兒乞言于公公曰是文有成構于胸
然非應酬可辦命置酒慈仁松下公至左手持
杯右手揮毫細念家門情事鉅麗大文倚馬立
就鵝谿十幅筆墨淋漓至以李固母子爲比又
云下巖穴之詔如漢史求骨鯁大儒我知辟疆
不以三公易一日也嗟乎此非公安知余之心
哉閱歲余偕壽六十時公再典禮闈特語穗兒

而翁進觴之文仍非我不可非我而翁必不以
爲可俟出闢更約灌湘周量至慈仁當于海棠
花下更一抒寫我兩人三十年真交也出闢卽
席成文書屏至午夜遣飛騎以漢玉卮文錦寄
壽文中旣以正人君子相許復以盲風噩浪相
傷至謂奉其艱難百折不磷不淄之身以孝養
老母爲盛世完人余惟愧汗追憶竹西促膝啣
杯情話今各有傷心之痛則我與公皆爲奉倩
安仁也使辟疆獨守東岡之陂不待北山獻嘲

自悔迴軫之不早東阡南陌續昔清驪久已心
許素交棹剡溪而歌招隱知辟疆必望長安而
一歎公詞旨纏緜神理抑塞惟我深念公見憶
之真亦不謂遂成讖語也庚戌冬送穗兒移寓
張螺浮黃門斷句十二首又遠索亾姬影梅庵
憶語調扁字韻賀新涼重踐廿餘年之約護月
太常夜成腹藁爲余序歲寒皆爲絕筆公才繪
來遊之言在耳高文大筆在屏錦三十年卽席
限韻寄懷諸詩百餘首與往來手札朱絲蠅頭

數十幅在篋笥而公歸天上亦曾下視人間有
衰殘潦倒鋒摧箭簇負傷心而悲力竭日爲祈
宗之祝不可得如余者乎兩兒沐公教養數年
恨不上之萬里扶搖今皆沈埋憑穢不與僂
公忍見乎更有如公特達之知視如子加之膝
者乎此余私感也衣被四海無論貧交故人日
車輪公之懷抱歲糜竭公之金錢卽孤生弱蒂
以及小技末藝之人誰不待菑于公之心血向
榮于公之日月哉古人云要人讚歎易要鬼神

讚歎難要鬼神讚歎易要鬼神不知難公之居
心皆鬼神不知之心公所爲事乃堯舜猶病之
事至其秉大憲爲士師樞府容臺兩典春官試
振綱肅紀起死回生與軍容禮樂之盛扶衰救
弊之權則書展勒銘載在國史家乘余公之耦
耕人也不復及尤異者余九月十四夜夢公過
余水繪把手如昔而神情淒瘁細視面覺浮瘡
蚤起呼見大爲不懌陽月初接京中書知重九
日新郡守金公乞書公以寄余詩書綾堅以寒

門爲託余喜甚詎意旬日而公訃音至三千里
外兩日靈旗迅至公之與余不負死生余之與
公殊慚後死余六年不至邗上近經年不能下
堂公喪歸命穗兒哭之淮又命穗丹兩兒哭之
邗追思三十年公至情過情之事多古人所無
有傳之後人不肯信者卽爲余隱憂切痛多未
易形之語言聊寫哀歌系以繁蔓以告公友龔
子令子伯通共一慟焉詩曰

文中繡虎人中龍昭代屈指淝水龔岱宗太華衡

恒嵩五嶽靈秀羅心胸金鐘大鏞序西東冰壺玉
衡懸秋空風雲際會明光宮赤手直捧虞淵紅吐
哺握髮延駿雄馬群冀北無畱蹤譬如百川盡朝
宗寸長一藝咸包容天街貫索射白虹秋荼束薪
葦笥同左執鬼伯右殤中刀塗血路晝晦蒙抗詞
申雪排九重生死肉骨劍戟鋒黑頭嶽嶽躋三公
昌言往救還彌縫門墻壁立萬仞峯一時桃李皆
昭融南箕北斗物望崇勒勲竹帛銘鼎鐘襄也奉
母謀尸饗辱公下採非與葑定交三十二芙蓉各

奉几杖相追從摩娑銅狄荆棘叢金人鉛泪流溶
溶聯牀風雨響秋蓬擊鉢酬和窮雕蟲身依薇座
紅雲封一心常念雞窠翁江頭鯉魚秋塞鴻往來
書尺紛郵筒介壽高文墨跡濃風生謾謾慈仁松
徐卿二子才凡庸市中擬碎爨下桐收之參苓入
藥籠假以羽翮資飛翬耦耕舊約誓始終灑掃荒
園糞墻墉功成身退歸明農白頭二老攜孤筇公
今入地持丹忠我老江皋心忡忡匹如駟驢與蛩
蛩失侶自顧憎微躬公神在天御豐隆朱旂閃閃

迴崆峒哭公老淚灑秋風海枯石爛無終窮